

摘藻堂四庫全書薈要

集部

欽定四庫全書薈要卷一萬八千三百六十

集部

御選宋詩卷五十三

七言律詩九

朱熹

夢山中故人

風雨蕭蕭已送愁，不堪懷抱更離憂。
故人只在千巖裏，桂樹無端一夜秋。
把袖追歡勞夢寐，舉杯相屬暫綢繆。
覺來却是天涯客，簷響潺潺瀉未休。

和劉抱一

幾年牢落舊村墟此日翛然水竹居
病起試尋春徑草客來聊煮雪畦蔬
開樽細說平生事信手同繙集古書
適意何勞一千卷新詩閒出笑談餘

奉陪彥集充父同遊瑞巖謹次莆田使君留題
之韻

踏破千林黃葉堆林間臺殿鬱崔嵬
谷泉噴薄秋逾響山翠空濛畫不開
一壑祇今藏勝概三生疇昔記曾來

解衣正作留連計未許山靈便卻回

伏讀二劉公瑞巖留題感事興懷至於隕涕追
次元韻偶成二篇

誰將健筆寫崖陰想見當年抱膝吟緩帶輕裘成昨夢
遺風餘烈到如今西山爽氣看猶在北闕精誠直自深
故壘近聞新破竹起公無路祇傷心

右懷寶學公作近
聞西兵進取闕陝

其帥即公
舊部曲也

投紱歸來卧赤城家山無處不經行寒巖解榻夢應好

絕壁題詩語太清陳迹一朝成寂寞靈臺千古自虛明
傳來舊業荒蕪盡慙愧秋原宿草生

右懷病翁先生作
翁領崇道祠官故

有赤城
之句

伏讀秀野劉丈閑居十五詠謹次高韻率易拜

呈伏乞痛加繩削是所願望

錄十首

秀野

為憐蘅芷滿芳洲特地臨江賦遠遊十畝何妨自春色
萬緣從此付東流靜看朝市真兒戲須信田園是老謀

出處知公有餘裕未應辛苦謝靈丘

積芳圃

樂事從茲不易涯朱門還似野人家行看靚艷須携酒
坐對清陰只煮茶曉起蒼涼承墜露晚來光景亂蒸霞
平生結習今餘幾試數毘那袂上花

香界

幽興年來莫與同滋蘭聊欲汎光風真成佛國香雲界
不數淮山桂樹叢花氣無邊曛欲醉靈氛一點靜還通

何須楚客紉秋佩坐卧經行住此中

春谷

武夷高處是蓬萊采得靈根手自栽地僻芳菲鎮長在
谷寒蜂蜨未全來紅棠似欲留人醉錦障何妨為客開
飲罷醒心何處所遠山重疊翠成堆

舫齋

扁舟容與小房櫳搖颺簾旌蜀錦紅兩岸蒹葭秋色裏
一川煙浪夕陽中不愁灩澦雙蓬鬢未怯江湖萬里風

築室水中聊爾爾何須極浦望朱宮

月波臺

潺潺流水注回塘中作平臺受晚涼
四面不通車馬跡一尊聊飲芰荷香
韓公無復吟花島楚客何勞賦葯房
少待須臾更清絕月華零露洗匡牀

晚蔬園

未覺閒來歲月頻荷鋤方喜土膏勻
連畦已放瑤簪露覆地行看玉本新
小摘登盤先餉客晚炊當肉更宜人

却憐寂寞公儀子拔盡園蔬不歎貧

藥圃

種藥春畦有近功不辭耘耔謾勞躬
漸看杞菊充庖下即見芝英入籠中
病去自知非往日身輕何必御冷風
出門會有兒童笑不是當年植杖翁

曲池軒

去年種竹長新篁今歲穿渠過野塘
自喜軒窗無俗韻亦知草木有真香
林間急雨生愁思水面微風度晚涼

却厭端居苦無事凭欄閒理釣絲長

前却梅

玉立寒煙寂寞濱仙姿瀟灑淨無塵千林搖落今如許
一樹橫斜獨可人真與雪霜娛晚景任從桃李殿殘春
綠陰青子明年事衆口驚嗟鼎味新

次秀野韻五首

使君簾閣對秋筠起看名園雨後春便賦新詩留野客
更傾芳酒酹花神未酬管樂平生志且作羲皇向上人

祇恐功名相迫逐不容老子卧漳濱

滿園紅紫已爭新百轉幽禽亦喚人蠟屐未妨泥步穩
珍叢終恨雨來頻卧看曉色忻初霽起約良遊醉好春
却笑當年金谷燕相隨僕僕望車塵

惆悵春餘幾日光從今風雨莫顛狂急呼我輩穿花去
未覺詩情與道妨蘿帶不須吟杜若角弓聊復賦甘棠
淋浪坐客休辭醉飲罷晞身向九陽

知君久矣厭喧卑造物尊前喚小兒一醪未應裁側弁

十分聊爾快翻卮
治中寂寞凝塵日
令尹憂勞退食時
正好相尋發孤笑
莫教牢落負心期

當年共翦北山萊
修竹成陰手自栽
書卷莫教春色老
柴荆肯為俗人開
公能顧我傳新句
我欲留公潑舊醅
悵望南園芳樹底
明年應放小車來

留秀野劉丈二首

好雨當春過一犁
我公遠憶故園西
孤篷穩轉清灘急
十里行穿綠樹齊
路熟已欣經霧市
身輕未怕躡雲梯

諸孫剩欲留公住
細和新詩丐指迷

一去屏山今幾春
歸來三徑但荒榛
剪除便覺風煙好
徙倚還驚物色新
樓外千林遮去路
階前一水戀行塵
勸君更作留連計
同社追遊苦未頻

又和秀野二首

愁陰一夜轉
和風曉看花
枝露彩濃
覓句休教長閉戶
出門聊得試扶筇
物華始信如詩好
春色方知似酒醲
多謝鄰翁笑相迓
為言晴暖更過從

江臯晴日麗芳華翠竹疎疎映白沙路轉忽逢沽酒客
眼明惟見滿園花望中景助詩人趣物外春歸釋子家
向晚却尋芳草徑夕陽流水遶邨斜

次秀野咏雪韻三首

閉門高卧客來稀起看天花滿院飛地迴杉篁增勝概
庭虛鳥雀噪空饑酒腸凍澀成新恨病骨侵凌減舊肥
賴有袁生清興在忍寒應未泣牛衣

一夜同雲匝四山曉來千里共漫漫不應琪樹猶含凍

翻笑楊花許耐寒乘興正須披鶴氅
淪甘猶喜破龍團
無端酒思催吟筆却恐長鯨吸海乾

開門驚怪雪交加亂落橫飛詎有涯
密竹不妨呈勁節
早梅何處覓殘花山陰客子須乘興
洛下先生想卧家
病廢杯觴寒至骨哦詩無復更豪誇

次韻雪後書事二首

晴煙裊裊弄晨炊雪屋流澌未覺遲
擬挈凍醪追勝踐
聊穿蠟屐過疎籬埽開折竹仍三徑
認得殘梅祇數枝

不耐歲寒心事苦滔滔欲說定從誰

未覺春光到柳條誰教飛絮倚風搖
眼驚銀色迷千界夢斷彤庭散百寮
梅塢任從長笛弄竹窗閒把短檠挑
何人剝啄傳清唱更喜殘年樂事饒

次韻秀野早梅

可愛紅芳愛素芳多情珍重老劉郎
疎英的皪尊中影微月黃昏句裏香
胸次自憐真玉雪人間何處有冰霜
巡簷說盡心期事肯醉佳人錦瑟傍

次秀野極目亭韻

偶向新亭一破顏
高情直寄有無間
地偏已隔東西路
天闊長圍遠近山
浩蕩祇愁春霧合
輪囷却喜暮雲還
不堪景物撩人甚
倒盡詩囊未許慳

再用秀野韻題翠壁

孤亭一目盡天涯
俯瞰煙邨八九家
翠壁何年懸布水
綠陰經雨墮危花
杖藜徙倚凝春望
覓句淹留到晚衙
珍重詩翁莫相惱
枯腸攪亂髣髴華

次亭字韻詩呈秀野丈兼簡王宰

幾年寂寞掩柴局抱膝長吟竹下亭不向參同論納甲
且將耘耔付添丁思玄賦罷驚遙舉止酒詩成恨獨醒
却笑春風兩蓬鬢飄蕭無復舊時青

次秀野韻題卧雲菴

君家丘壑本圓成何意尋荒入翠屏為愛晴雲薦孤枕
故將閒日付新亭夢魂寂寂衣裳冷心事悠悠簡策青
更把枯桐寫竒趣鷗絃寒夜獨泠泠

次韻寄題芙蓉館三首

亂山叢裏有江鄉
華館清波引興長
正喜白鷗輕易狎
忽驚紅妓儼分行
臨流更好揮椽筆
俯檻何妨接羽觴
共說仙翁閒日月
不因青草夢池塘

幻成飛閣笑談餘
便有新荷水面鋪
指點清波浮菡萏
驚呼紅影碎
嫩隅且將伴侶同
杯酒不用君王予
鏡湖多少故交臺
閣上問渠落拓更能無

不須艇子棹歌來
且看芙蓉面面開
卷裏有詩多錦繡

席間無地可塵埃風清月白琴三弄綠暗紅深酒一杯
明日仲宣樓上去越吟應是首頻回

次韻雪後書事二首

惆悵江頭幾樹梅杖藜行遶去還來前時雪壓無尋處
昨夜月明依舊開折寄遙憐人似玉相思應恨劫成灰
沈吟日落寒鴉起却望柴荆獨自回

滿山殘雪對虛堂想似當年輞口莊門掩不須垂鐵鎖
客來聊復共藜牀故人聞道歌圍暖妙語空傳醉墨香

莫為姬姜厭憔悴論文把酒話偏長

次秀野雜詩韻

葺居二首

丈人高卧碧江頭門掩西風萬木秋
重喜青山還遶屋却嫌黃葉漸平溝
開軒且放浮嵐入決水徐通廢圃流
便覺園林頓蕭爽不妨隨境味玄幽

向來鞅掌元非病此日徜徉詎有妨
自喜登臺閑瘦竹人驚步屨響空廊
高齋雨過新山色曲沼風來舊水光

千里壯心殊未已不應踈嬾興能長

刻漏

無疑莫詣君平肆任運休尋季主家謾設銅壺候尺咫
閑參玉表驗分差不妨啓處知時節那更榮枯紀歲華
却羨昇平好官府日高三丈放朝衙

栗熟

樹雜椅桐繼國風莫教林下長蒿蓬

種樹法栗下
不得有草木

共期

秋實充腸飽不羨春華轉眼空病起數升傳藥錄

本草
云人

有脚弱立栗樹下啖
及數升遂能起行

晨興三嚙學仙翁

蕪黃門詩云老去自添腰脚病

山翁服栗舊傳方客來為說
晨興晚三嚙徐收白玉漿

櫻桃浪得銀絲薦一笑纔

堪發面紅

銀絲見杜詩本草云櫻
桃服之令人美顏色

山藥

怪來朽壤耀瓊英小劖傾筐可代耕
秦豹於人儘無分
蹲鴟從此不須生
雪鑱但使身長健
石鼎何妨手自烹
欲賦玉延無好語
羞論蜂蜜與羊羹

陳闕齋玉延賦有
蜂蜜羊羹之句

食梨

珍實渾疑露結成香葩況是雪儲精乍驚磊落堆盤出
旋剖輕盈照骨明盧橘謾勞誇夏熟蔗漿未許析朝醒
啖餘更檢桐君錄快果知非浪得名

本草謂梨
為快果

導引

聞說牛刀久不更閒中應接羨門生向來已悟藏千界

呂公詩云一粒
粟中藏世界

今日何勞倒五行

道書云五行顛倒
術龍從火裏出

按

躋有時聊戲劇居心無物轉虛明舉觴試問同亭侶九
轉工夫早晚成

假山焚香作煙雲掬水為瀑布二首

平地俄驚紫翠堆，便應題作小飛來。
爐熏細度巖姿出，綫溜遙分壁色開。
獨往但憑南郭几，遠遊休剪北山萊。
人言造化無私力，珍重仙翁挽得回。

一簣工夫莫坐談，便教庭際湧千巖。
眼中水石今成趣，物外煙霞舊所耽。
泉細寒聲生夜壑，香銷暝靄變晴嵐。
兒童也識幽棲地，共指南山更近南。

題鄭德輝悠然堂

高人結屋亂雲邊，直面羣峰勢接連。
車馬不來真避俗，簞瓢可樂便忘年。
移筇綠幄成三徑，回首黃塵自一川。
認得淵明千古意，南山經雨更蒼然。

鷺湖寺和陸子壽

德義風流夙所欽，別離三載更關心。
偶扶藜杖出寒谷，又枉籃輿度遠岑。
舊學商量加邃密，新知培養轉深沉。
却愁說到無言處，不信人間有古今。

九日登天湖以菊花須插滿頭歸分韻賦詩得

歸字

去歲瀟湘重九時滿城寒雨客思歸故山此日還佳節
黃菊清尊更晚暉短髮無多休落帽長風不斷且吹衣
相看下視人寰小祇合從今老翠微

白鹿講會次卜丈韻

宮牆蕪沒幾經年祇有寒煙鎖澗泉結屋幸容追舊觀

題名未許續遺編

請為洞主不報

青雲白石聊同趣

謂西澗劉公

霽

月光風更別傳

謂涿溪夫子

珍重箇中無限樂諸郎莫苦羨

騰騫

和張彥輔雪後棲賢之作

夜來春雪徧林丘却喜風威曉便收
好上籃輿閒縱目
莫將衲被苦蒙頭
微官正愧逍遙社
勝日猶堪汗漫游
欲出林闌戀瑤草
不妨尊酒更淹留

伏承侍郎使君垂示所與少傅國公唱酬西湖
佳句謹次高韻聊發一笑

百年地闢有奇功
創見猶驚白髮翁
共喜安車迎國老

更傳佳句走郵筒
閒來且看潮頭入
樂事寧憂酒醖空
會見台星與卿月
交光齊照廣寒宮

越王城下水融融
此樂從今與衆同
滿眼芰荷方永日
轉頭禾黍便西風
湖光盡處天容闊
潮信來時海氣通
酬唱不誇風物好
一心憂國願年豐

懷潭溪舊居

憶住潭溪四十年
好峰無數列窗前
雖非水抱山環地
却是冬溫夏冷天
繞舍扶疎千箇竹
傍崖寒冽一泓泉

誰教失計東遷繆，億卧西窗日滿川。

已未九日子服老弟及仲宣諸友載酒見過坐
閒居厚廟令出示佳句歎伏之餘次韻為謝并
呈同社諸名勝

籬菊斑斑半吐黃，泚中又報紫萸香。

泚川有茱萸
泚字與泚同裝成

令節秋還晚，撩得高情老更狂。載酒極知乖勝踐，沾衣

却免歎斜陽。

是日本約會於周圍屬
有故不果出因集子舍

餘年只恐逢辰

少吟罷君詩引興長

叔通老友探梅得句不鄙垂示且有領客携壺
之約次韻為謝聊發一笑

迎霜破雪是寒梅何事今年獨晚開應為花神無意管
故煩我輩著詩催繁英未怕隨清角疎影誰憐蘸綠杯
珍重南鄰諸酒伴又尋江路覓香來

呂祖謙

聽雨軒

弟兄真樂有誰知頗憶蘓公聽雨詩小院深沈人靜後

虛簷蕭瑟夜分時對床夜夢歸燈火浮世身名付酒卮
書冊一窗生計足怡然戲綵慰親思

張栻

憇清風峽

扶疎古木矗危梯開始知經幾攝提還有石橋容客坐
仰看蘭若與雲齊風生陰壑方鳴籟日烈塵寰正望霓
從此上山君努力瘦藤今日得同携

喜廣仲伯逢來會

二阮向來俱莫逆支筇為我到山巔
濁醪共飲聊復爾
勝集於今亦偶然人立千峰秋色裏
月生滄海暮雲邊
高談此地曾知幾一笑歸來對榻眠

遊道場山次沈國錄韻

玻瓈盆外起千鬟路入空濛紫翠間
心遠最便天宇迴
眼明偏見野雲閒寒泉宰木留千載
清磬疎鐘度兩山
我亦湘城三徑在湖邊歸去洗塵顏

早秋湖亭

澤國今年秋氣早湖亭清晚獨裴徊翩翩翻荷蓋隨風舞
蕭瑟松聲帶雨來靜處豈云身計得吟邊但覺歲華催
悠悠遠思憑誰寫多病新來罷酒杯

重九日與賓佐登龍山

曉風獵獵笛橫秋澤國名山九日游萬里煙雲歸老眼
千年形勢接中州丘原到處堪懷古萸菊隨時豈解愁
此日此心誰共領朝宗江漢自東流

何異

題環翠閣

環翠閣邊無點埃，盡收清致助吟才。
溪頭月落漁煙散，岸口城低野色來。
斜檻半依秋樹出，小窗知為北山開。
沙禽占水閒相趁，悞入疎簾靜却回。

王十朋

題湖邊莊

十里青山蔭碧湖，湖邊風物畫難如。
夕陽茅舍客沽酒，明月小橋人釣魚。
舊卜草莊臨水竹，來尋野叟問耕鋤。

他年待挂衣冠後乘興扁舟取次居

和李梗

維摩老病思何堪藥性從今却漸諳
掩卷正思眠丈室論文俄喜遇奇男
共嗟世路羊腸險剛怕人情鼠口甘
聳壑昂霄君未晚吾衰已是食三蠶

次韻咎監務早梅

羣芳避路放梅開奔走遊人滿砌苔
半樹溪邊衝雪破一枝頭上帶春回
月移瘦影供吟興風薦幽香襲酒杯

剛被西湖都道盡至今詩客句難裁

詠柳

東君於此最鍾情妝點邛邛入畫屏向我無言看自展
與人非故眼猶青縈牽別恨絲千尺斷送春光絮一亭
葉底黃鸝音更好隔溪煙雨醉時聽

梅花次賈元節韻

南枝昨夜暖先回壓盡羣芳獨自開仙客風中飄素袂
玉妃月下試新裁未憑驛使殷勤寄首辱新詩特地來

明日雪晴須共賞為花撿却飲千杯

醪醑次賈元節韻

春山杜宇喚人歸歸見醪醑滿架垂葉底半開千顆白
鬢邊斜插一枝奇園林綠樹成陰後庭院青春欲老時
把酒對花歌數闋濡毫更和鹿巖詩

寓小能仁寺即事書懷

小園青徑梅溪老綠水紅蓮越幕賓藥裹隨身多半夏
花枝照眼只長春郡樓鼓角聽殊遠僧舍鐘魚聞已頻

窗外清風數竿竹
淡然相對淨無塵

登詩史堂觀少陵畫像

萬丈光芒筆有神
兩眉猶帶舊酸辛
殘杯不復隨肥馬
賸馥端能丐後人
夔子江頭吟處景
杜鵑聲裏拜時身
敬瞻遺像觀詩史
一酌雲安麴米春

夜雨述懷

夜深風雨撼庭芭
喚起新愁似亂麻
夢覺尚疑身是蜨
病蘓方悟影非蛇
澆腸竹葉頻生暈
照眼銀釭自結花

我在故鄉非逆旅不須杜宇喚歸家

九日登卧龍山呈同官

老逢佳節強躋攀興遠東籬媿未還與客攜壺登縹緲
尋僧對榻卧幽閒白鹽照日一峰古烏帽吹風雙鬢斑
坐上元非孟嘉輩卧龍山却勝龍山

臘日與同官小集八陣臺謁武侯新祠

伏幾何時臘又逢天涯尊酒記游從未於山下祠黃石
且向江濱謁卧龍青眼共看官舍柳白頭相對雪天峰

虎符願逐桃符換萬里歸心一片濃

吳儆

和呂守環秀堂

田家但識豐年樂見說花城日更長如獲從公時拄笏
尚能援筆侑飛觴雞豚社甕年年酒柿栗園林樹樹霜
更倩漁郎問樵徑深山深處是吾鄉

次韻李提點雪中登樓之作

高樓思久入天涯瑤海光中景象賒未說因風翻柳絮

須知和月上梅花山茶有句真成畫庭柏無心不受誇
人物梁園零落久一時勝賞屬詩家

王阮

長風沙次宋丈韻一首

已將身世等河沙又泛春江看浪花錦纜牙檣君送酒
蓑衣蒻笠我浮家淹留日覺青春暮飄泊風兼細雨斜
安得崑崙能探水試教來奏小琵琶

題高遠亭一首

一作周紫芝

小攜尊酒作清遊行到方壺最上頭山在斷霞明處碧水從白鳥去邊流苦無妙句窺天巧賴有名亭慰客愁從此江南添勝景未應獨數庾公樓

龍塘久別乘月再到奉呈同社

龍堂疇昔擅雲煙破月重來倍爽然浮玉北堂三萬頃扁舟西子二千年青山識面爭迎櫂白鷺知心不避船華髮脩脩更何往一茅終在此橋邊

方信孺

玩珠巖

歸舟多載小江春
重訪東巖舊履痕
插水峭崖猶有路
垂天怪石本無根
金華仙伯真知己
蕙苾將軍足斷魂
安得北山公可作
倩渠移取向家園

題龍隱巖

愛山那惜走千回
生怕前驅後騎催
石上參差鱗甲動
眼中在處畫圖開
參鸞未辨乘風去
浮鷁何妨載雨來
人事百年俱變滅
祇應題字不塵埃

雨脚初收魚尾霞滿溪流半溪花尋源曾識武陵洞
泛宅如浮茗雪家但得嵌空元有路何如峭絕不容車
道人辛苦經雲水成塔從來是劫沙

遊中隱巖至新洞作

尋徧洞天三十六蒼靈獨秘此巖扉旋除野草開新徑
遮莫寒藤刺客衣歲月偶同題壁字煙霞似不放人歸
把茅欲作開山主已落瞿曇第二機

林光朝

次韻賀丘國鎮致仕

桃花流水是家鄉
洛下才名四十強
自有赤松堪辟穀
那能白首更為郎
案頭貝葉忘言久
江上蓴羹引興長
邂逅却成香火社
好將詩句細商量

奉題游洋張明府流香亭時以薦章數下涉秋
月馬首且欲西矣因以寄意云

封題青李數緋桃
處分園林意自豪
旋出篇章陪樂府
更憑花木續離騷
醪架下提春榼
蓆筍林中滴夜槽

却是西風生馬耳未應老大笑牛刀

薛季宣

雨後憶龍翔寺

好溪東赴海門秋中有禪居湧碧流潮信往來雙別嶼
世緣生滅幾浮漚菱歌面面來魚鼓燈火層層到客舟
何事瓜期外留滯短窗斜雨不堪愁

樊口見鄭崇陽不遇

經時兀兀坐筠鄉命駕崎嶇傍夕陽島嶼西陵開罨畫

湖山東鄂洗新裝路侵細草迷繁綠風落閒花憶舊香
却上渡船歸去也不逢安道故無妨

呂定

雪夜

漠漠同雲徧海涯曉風寒逼綠窗紗飛揚鱗甲三千界
粧點樓臺百萬家何處妙歌金障酒誰人清對玉梅花
便應石鼎融冰水烏帽籠頭自煮茶

望岱岳

岱宗東望鬱嵯峨萬丈仙橋鳥外過秦樹千年空老大
漢碑終古不消磨天壇夜靜垂星斗石磴春深長薜蘿
記得舊遊曾載酒頽然峰頂放長歌

望嶧山

極目東山秀色濃紫霄千葉醉芙蓉題詩尚記仙人洞
飛珮曾過玉女峰樹老孤桐秋露下碑殘古篆暮雲封
何時再醉天門月卧聽清風萬壑松

度大庾嶺

鑿破鴻濛一竅通至今傳說九齡功
天垂瘴雨蠻煙外路入炎荒火樹中
萬里關河瞻北極兩行旌旆過南雄
鷓鴣聲裏端陽近榕樹青青荔子紅

遊海珠寺

何年神物抱珠遊遺向滄浪第一洲
五色化成金世界六鼇擎出寶香樓
光涵鮫室星辰動影落龍宮日月浮
萬古團團天地裏磬聲敲徹海門秋

登廣城樓

三尺龍泉事遠遊
越王臺上望南州
一天雨過千山曉
萬里風來五月秋
江郭樓臺蠻客市
海門煙日蜚家舟
臨戎不有安邊策
應媿常為薦馬周

陸九齡

鷺湖示同志

孩提知愛長知欽
古聖相傳只此心
大抵有基方築室
未聞無址可成岑
留情傳注翻榛塞
著意精微轉陸沈
珍重友朋勤切琢
須知至樂在于今

陸九淵

與僧淨璋

自從相見白雲間
離別常多會聚艱
兩度逢迎當汝水
數年隔閏是曹山
客來濯足倚僧怪
病不烹茶侍者閒
不是故人尋舊隱
只應終日閉禪關

劉燭

瑞慶聖節應制

皇家卜世過周唐
天啟真人應運翔
抱日預占恭邸夢

飛龍曾報皖山祥翠雲影外來金母紅霧香中擁玉皇
樂府賦工無以祝願將金鑑代珠囊

王炎

和游堯臣勸農韻

傳呼穩凭筍輿行喜見漫山麥浪平道上老農皆好語
年來瘦地有新耕草深黃犢陽坡暖雨過青蒲野水生
桃李陰中春事好田家雞犬亦歡聲

解官到郡諸丈置酒岳陽樓招炎為客鄧巴陵

索詩

重上危樓覽洞庭故人一笑對飛觥
君山只似觚山綠江水不如湘水清
一日勝遊成樂事三年俗吏減詩情
天涯邂逅還離別莫惜尊前底裏傾

戴敏

屏上晚眺

不能騎馬趁朝班自跨黃牛扣竹關
無德可稱徒富貴有錢難買是清閒
人行躑躅紅邊路日落秭歸啼處山

遙望蓬萊在何許扶桑東畔白雲間

樓上

終朝役役晚來閒識破浮生一夢間挈榼去沽深巷酒
倚樓貪看夕陽山月臨江館人橫笛風摺蘆花鴈度關
堪羨漁翁無檢束扁舟占斷白雲灣

陳造

縣西

一徑斜穿犖确行身閒尤覺馬蹄輕坡頭嘉樹千幢立

煙際長江匹練橫
茶鼓適敲靈鷲院
夕陽欲壓赭圻城
一春簿領沈迷裏
野鳥山花眼最明

行都

露冷河傾斗柄低
望仙橋外獨歸時
風梳御柳娟娟靜
月度觚稜故故遲
幾處清歌留客醉
誰家長笛倚樓吹
太平喜樂朝仍暮
帝力何曾爾輩知

題林監稅漁鄉小樓

半是蜚軒半是樓
主人雅趣寄滄洲
晨霞暮靄紛濃淡

越舶番檣闕去留徒倚想君舒醉眼從容須我掉吟頭
病來止酒便高卧幾夢煙波沒白鷗

春雨贈陳主管

初宵微月尚窺簷雨脚斜斜曉入簾春謝歡悰風處減
愁將老色鏡中添頗思甫里陪觴詠不歎周南更滯淹
倚賴宗盟慰牢落得閒詩筆未妨拈

宿野人家

步尋松篠款谿筇忽到孤山處士家十頃蒼鱗漾牆角

一鉤寒玉插簷牙
杯行不乏紅絲鱠
飯了仍供白露芽
把臂傾舒吾已怯
又分離緒上歸槎

武昌

客子修程未息肩
江山佳處小留連
醉臨庾亮樓前月
夢闖回翁洞裏天
形勢盤縈蹲虎鳳
輪蹄隱軫度絲絃
登高欲賦還東望
楚些無因喚謫仙

姜特立

和劉建昌都下立春

宮堯天闕五雲飛日上觚稜曉影移合殿侍臣頒彩樹
誰家纖手送青絲寒禁粉藥香猶淺煖入疎根綠尚遲
從此江山春意動使君擿費幾多時

和陸郎中

午庭風雨撼高槐一洗城頭十丈埃老子座間尋句去
故人門外寄詩來勁鋒久服穿楊妙鈍思深慙擊鉢催
請佩左符君未可要聽吟思發春雷

歸山間舟中寄黃正言

黑風吹雨亂雲奔一舸浮家過別邨
便有新涼生竹樹更添清興集盤尊
打篷點點催詩思著雨蕭蕭冷醉魂
來日小溪山水活一波盡是使君恩

漁舍新成

旋規漁舍傍溪山山轉溪迴翠竹間
閒看羽觴行詰曲戲拈竿線弄潺湲
浮家不入分風浦歸棹休尋落照灣
漫說五湖煙浪好幾人險處得心閒

為通州守賦綠漪亭

景物天開四面寬如披百幅畫圖看有時鷗鷺下蒼靄
無數菰蒲生碧瀾獨立晚涼秋思動醉呼小艇水雲寒
他年虎節重來訪唯有恩波不解乾

陳傅良

楊伯子持其尊人誠齋南海集為贈以詩奉酬
得與門牆最不遲白頭方誦嶺南詩文從嘉祐今三變
人在廬陵此一時細數儒先能幾見獨憐歲晚欲何之
瀟湘直下長江去得望蓬萊卻更疑

陳亮

及第謝恩和御賜詩韻

雲漢昭回倬錦章
爛然衣被九天光
已將德雨平分布
更把仁風與奉揚
治道修明當正寧
皇威震疊到遐方
報讎自是平生志
勿謂儒臣髣髴蒼

姜夔

寄田郎

楚楚田郎亦大奇
少年風味我曾知
春城寒食誰相伴

夜月梨花有所思剪燭屢呼金鑿落倚窗閒品玉參差
含情不礙逢人說鸚鵡能歌自作詞

夏日奉天台祿

青天揮箠卧藤床翠袖攜壺送酒漿蝟腹出波烹芡實
裏蹄和露擘蓮房相呼時入雞豚社獨坐曾無鴈鷺行
便是赤城真隱吏不須劉阮更相將

劉翰

春晚呈范石湖

風日蕭蕭兩鬢華
倦尋銀筆賦餘霞
五更枕上無情雨
三月風前薄命花
春困有時因病酒
客懷何日不思家
年來事事心情嬾
惟有歸耕策最嘉

張良臣

次韻持上人題延慶寺清玉軒

水芳未動城南路
一一僧簾有竹看
政爾塵埃能自表
故應悠久澹相安
長楊晚獵干戈肅
古棘春朝萬玉寒
碧眼阿師來授記
化龍飛去抑何難

趙子覺

書懷

柳影槐陰綠遶廳日長細得話詩情迎風紫燕忽雙去
隔雨黃鸝又一聲筆墨生涯成冷淡筍蔬盤饌易經營
世間微利真刀蜜有底驅馳取重輕

翠豐

夜雨曉起方覺

夜雨鳴簷送五更不驚高卧最多情窗間細視花無恙

牆外隨聽屐有聲數把柔絲堤柳嫩一奩方鏡聞波清
出門眼界殊明潔但覺春寒處處生

寒夜

瓦欲飛霜水欲冰蒲團今夜有塵凝爐寒閒取薪添火
窗暗時將燭助燈久欲歸田游宦客未能忘肉在家僧
於書更覺心情嬾病眼愁看細字蠅

林亦之

寄精嚴谷堂惟頤老宿二十年欲訪谷堂觀筆

法因循去未得偶逢水西客
沉吟久之因寄此詩

隔浦娟娟古佛廬幾回欲去更踟躇
敢誇柳氏元和脚要問隋僧智果書
見說交情多雋達每慙識面尚生疎
山頭紅葉知無限可許閒人暫寓居

滕王閣懷古奉呈撫州別駕兼簡戶曹

城邊帝子閣西頭水遶南昌故郡流
浦曲天長鷗侶小夜深雲淨月華浮
澹臺墓暗竹根古孺子亭荒荷葉秋

漠漠滄江無了日哦詩休接古人愁

同安撫趙子直餞朱晦菴於懷安得重字

祖帳寒梅白未空已看新葉綠重重
八州斧鉞送行客十里旌旗遶暮峰
北斗獨高韓吏部南州爭慕郭林宗
一時賓主俱豪傑敢道招要到野農

陳藻

客中書事

千載蠻風尚有存此來聞見不堪論
豬膏澤髮湘南婦

牛渤塗門嶺右邨行客下床調瘴藥吏人提甕灌蔬園
豈無佳麗堪娛目別有淒涼只斷魂

章甫

寄荆南故人

餘生自判一虛舟未害尋詩慰客愁
梅欲飄零猶醞藉柳纔依約已風流
關心弟妹無黃犬入夢江湖有白鷗
別後故人相念否東風應倚仲宣樓

丁逢

八詠樓

檻外溪山縹緲樓共看雨歇漲痕收天開圖畫無窮態
峽束盤渦自在流賦咏偶然休弔古登臨政爾可銷憂
邛郫九折經行徧又向東吳寄此遊

後十日重遊

層樓重到已經旬遠岫晴嵐發興新風送炎天隋冰雪
香清仙界引星辰茶瓜暫喚林間客杖屨長輸物外人
便欲從遊赤松子君恩應許乞微身

方有開

方仙翁祠

真仙祠觀鎖晴嵐下瞰平疇十里寬
譜牒尚遺唐篆額風儀仍是漢衣冠
紫芝白兔靈如昨石碣丹湖事不刊
千載仍孫牛馬走敬瞻遺像仰高寒

胡朝穎

小金山

天光雲影碧相涵百頃玻璃一望間
綠水遶門迷客渡

白雲終日伴僧閒
疎鐘破曉潛虬動
老木成陰倦鳥還
喚取頭陀磨石壁
為渠題作小金山

樓鑰

海潮圖

錢塘佳月照青霄
壯觀仍看半夜潮
每恨形容無健筆
誰知收拾在生綃
蕩搖直恐三山沒
咫尺真成萬里遙
金闕峒堯天尺五
海王自合日來朝

環邨踏雪

筍輿衝雪過溪橋流水方東未晚潮白裏不知梅奪色
青邊尤喜麥成苗煙深帶雨參差下天闊隨風自在飄
可是忍寒詩更切故求野路踏瓊瑤

淨明方丈

雲深宿雨未收晴短艇還來叩曉扃山溜擁谿侵石磴
天風吹霧暗空庭茵茵鋪野草溼新綠玉立修篁洗舊青
老我時時假僧榻夢魂真向醉中醒

高似孫

答武昌吳廣文

平生不識武昌樓，官柳青青好在不。
庾亮笛吹黃鵠月，簡栖碑駁碧苔秋。
山橫赤壁含情斷，水出瞿塘快意流。
何處叫君同一醉，並舟秦女擘篴篳篥。

危稹

送鼂告院得南康

我是康廬舊冷官，夢魂今尚憶雲端。
山將草色連天碧，泉帶松聲出谷寒。
仙觀幾年留鶴隱，古潭有日起龍蟠。

使君肯著詩料理乞我蠻牋半幅看

表萬頃

玉山道中時赴掌故之命

麥苗堆綠菜花黃一簇人家古道傍
酒熟不妨邀里巷年豐贏得事農桑
世情只說宦遊好客裏那知歸興長
我有生平蓑笠在釣絲何日理斜陽

睡起書懷時諸公相勉再出

北窗終日廢書眠一枕清風值萬錢
雲度茅簷輕冉冉

泉生石砌淨涓涓不嫌雨脚花間住要聽秋聲屋外傳
三徑初成吾欲老幕中何用泛紅蓮

大雪次韻

誰知天巧出元機但怪飛璫過眼奇
暝立風枝寒雀倦
愁吟冰谷曉猿饑
蘆花洲渚月明夜
柳絮池塘春暮時
此景人間不常有
寫真傳影正須詩

題小桃源

半月池邊倚瘦藤
望仙臺上岸烏巾
塵埃一點不到地

花木四時長是春載酒豈無好事者爛柯應有著碁人
請君更種桃千樹準擬漁郎來問津

夜坐

爐火篝燈孰與同此心吾欲付冥鴻茅簷已作涉旬雨
蕙帳不禁連夜風一段清愁詩句裏十分寒事酒杯中
溪雲未用安排雪且聽梅花試小紅

劉宰

送邵監酒兼東儀真趙法曹呈潘使君

儀真來往幾經秋風物淮南第一州山勢北來開壯觀
大江東下峙危樓沙頭縹緲千家市艫尾連翩萬斛舟
去去煩君問耆老幾人猶得守林丘

漫堂晚望

霽色催雲作晚霞小橋却立岸烏紗雨餘菱芡新抽葉
秋早菰蒲未著花燈影微茫行客艇鐘聲縹緲梵王家
沉吟索句輸公等我欲臨流理釣槎

寄題戴氏別墅

聞君築室水雲鄉一榻脩然獨老龐近挹荷香供几案
遠邀山翠入軒窗自歌自笑遊魚樂時去時來白鳥雙
何日過門成夜泊一尊相與對銀缸

代東寄張端衡

句曲山頭白鶴飛遙憐綵棒正宣威仙家有喜迎仙吏
客路無塵點客衣月澹郊原從犬卧秋高籬落任雞肥
子真東野齊名在莫向西風苦念歸

崔與之

楊州官滿辭后土題玉立亭

天上人間一樹花五年於此駐高牙
不隨紅藥矜春色為愛霜筠耐歲華
四塞風沈天籟寂半庭月冷市塵賒
臨行更致平安祝一炷清香十萬家

劉過

上袁文昌知平江

欲上姑蘓望虎丘小邦寧有此風流
山川形勢今三輔人物英雄古列侯
華屋鱗鱗冠蓋里畫橋曲曲管絃樓

金陵蜀郡俱疎遠除却皇都第一州

寄張都幹蒙正

林深葉密綠陰繁荷漸生芽蒲有根心事蹉跎過歲月
故人落寞共乾坤舟行蓴菜水雲浦路入楊梅煙雨邨
何日扣門尋子去一尊聊對話黃昏

南康天開圖畫樓

樓外煙波渺去鴻樓頭廬阜翠摩空故知造物鋪張巧
不費丹青點染工赤壁江山橫夜月輞川庭館卧秋風

祇今滿地無圖畫畫在西灣香靄中

寓公坊

秋風漸漸正吹涼似報歸期未欲忙尋路竹間深入寺
泊船沙外遠依庄小槽壓酒珠紅滴新飯炊粳雪白香
更聽夜來思遠浦軍聲十萬似錢塘

醉中偶成

小院葡萄月架東舞腰忙趁鼓聲雄詩成綵筆分題後
人在金釵賭令中秋葉冷吟風浩蕩晚林烘透日玲瓏

腰間若佩滁州印定有人呼作醉翁

呂聲之

舒城道中

還轅天作十分晴瀉出秋光一派清走筆欲題人到跡
揚鞭不住馬嘶聲頃禾晚熟黃雲色籬菊朝含白露英
得似淵明便歸去候門童稚出歡迎

西寺留題

白石孤雲自在閒紅塵一事不相關寺邊翠靄青蘿外

人到落花流水間欲取錦囊收勝槩慚無玉帶鎮名山
白蓮喜結當年社未厭朝來暮便還

九日登資福山呈胡宣教

飛屐來登最上峰千山擁翠景無窮遙看雲影參差外
靜聽泉聲斷續中今日黃花重九約何時青眼一尊同
好天風月閒相寄早晚南來有過鴻

題龍翔觀

曾到龍翔不記年兩峰巍壓水中天潮生潮落青蕪外

人去人來白鷺邊
四接遠遊僧萬笠
重新舊觀屋千椽
東南送目秋無際
隔岸人家問釣船

汪莘

寄潘倅

夢魂何事練溪濱
起自新春向晚春
紅杏園林催百舌
綠楊洲渚薦重唇
一年好處是寒食
三月水邊多麗人
遙想使君行樂處
牡丹如障草如茵

夜興

倚天長劍為誰收欲獻君王鎮九州
世事漫隨紅日下壯心空逐碧江流
鴈橫西塞偏愁客菊綻東籬始當秋
抖擻向來塵土夢便提蓑笠上漁舟

杜梅

陸務觀赴召

四海文章陸放翁百年漁釣兩龜蒙
數闔天地吾何與老作春秋道未窮
李耳守官逾二代張蒼職吏到三公
坐令嘉泰逢周漢此是君王第一功

御選宋詩卷五十三



總校官庶吉士臣侍朝

校對官檢討臣蕭九成

騰錄舉人臣李駟

欽定四庫全書薈要

集部

御選宋詩卷五十五

四

詳校官原任主事臣李斯咏

欽定四庫全書薈要卷一萬八千三百六十一

集部

御選宋詩卷五十四

七言律詩十

岳珂

春波堂小飲懷棠湖舊隱

平生到處西湖長
眼底波光日日新
圖在輞川非舊隱
夢回笠澤是前身
一江細雨欹青菊
萬里雄風起白蘋
獨立蒼茫動歸興
釣磯須理未垂綸



太平興國宮

槐影西清舞翠鸞竹宮高接五雲環
職陪溫洛圖書地名在元封卜祝間
晝訪未承龍閣問晨香猶廁羽衣班
祠官到處無公事且聽松聲老此山

新荷出水

貼水初翻紫玉團忽驚矗立傍闌干
瑤池七日來青鳥玉鑑孤奩舞翠鸞
曉露走槃珠顆瑩晚風颺蓋雪衣寒
從今十丈開花面太華峰頭更一看

夢尚留三橋旅邸

天上歸來打六更夢回搔首正曹騰玉霜初上三橋月
絳綵猶明九市燈聲徹銅魚催勦箭影斜金鵲在觚稜
帝鄉東望重回首佳氣何時到五陵

雨中觀廬山

雨裏觀山負不同何須九疊看屏風紫觚壇上排蒼壁
青步障邊鋪翠茸谷錦未迴晴日照衣綃聊借淡煙籠
祇今萬木添紅纈更倩青霜染曉楓

劉仙倫

西林留題

路入康廬西復西，翠煙深處著招提。
山僧幾輩雪垂領，水鳥數聲雲滿溪。
莫對青山談世事，且循粉壁看留題。
禪房夜卧衣裳冷，夢破鐘聲落月低。

盱江道中

屈曲清江遶徑斜，綠陰深處隱人家。
嵐昏山色未還觀，水落漲痕猶在沙。
麥熟村村喧水碓，蠶成處處響繰車。

馬頭忽覺清香近路轉橋南有野花

張漕仲隆快目樓

天上張公百尺樓眼高四海氣橫秋
祗愁笑語驚閭闔
不管闌干犯斗牛
遠水拍天迷釣艇
秋風萬里入貂裘
眼前不著淮山礙
望到中原天盡頭

岳陽樓

八月書空鴈字聯
岳陽樓上俯晴川
水聲軒帝釣天樂
山色玉皇香案煙
大舶駕風來島外
孤雲銜日落吟邊

東南無比登臨地遣我飄飄意欲仙

程秘

作堂六桂之東命之曰桂生取漢人招隱篇桂樹叢生之語也詩以記之

幾年列植擅青芳今日標題始作堂
遠向松岡分老蔭近於菊畹借寒香
地雖未離人間世心已全然物外鄉
最好夜來清絕處飛霜帶月下南塘

流觴西湖用范左史韻

畫船同載若登仙，却笑泥羈馬不前。
要識冷煙催穀雨，須知澹日養花天。
千條翠柳隨風舞，一樹夭桃照水妍。
始信人生行樂耳，虛名那用世間傳。

教陶孫

臯亭山

樵路縈紆入翠微，清泉白石可忘機。
雲中犬吠劉安過，樹杪春深望帝歸。
白鶴曾留華表語，蒼官合受錦衣圍。
珠襦玉柙今何許，一笑人間萬事非。

趙師秀

答徐靈淵

敝廬補葺雖勞力且得幽閒住此身舊友誤稱吟筆長
諸新爭笑罷官貧近簷竹密妨巢雀當戶花疎見路人
所慮久晴田事廢今聞高下雨皆勻

寄徐丞

病不窺園經一月更無人跡損青苔池禽引子銜魚去
野蔓開花上竹來亦欲髣髯毛休似雪爭如丹汞只為灰

秋風昨夜吹寒雨有夢南遊到海迴

送奩上人抄化

冒寒獨向何方去為建靈山閣未能詩卷帶呈看疏客
藥爐留借共房僧夕陽岸上行枯葉瀑布巖前聽拆冰
事到有緣隨處應回來金碧入雲層

陳待制湖樓

何處飛來縹緲中人間唯有畫圖同兩層簾幙垂無地
一片笙簫起半空巖竹倒添秋水碧渚蓮平接夕陽紅

遊人未達蒙莊旨虛倚闌干面面通

送翁卷入山

已送山民歸舊廬子今復去我何如漸成老大難為別
早占清閒未是疎小雨半畦春種藥寒燈一盞夜修書
有人來問陶貞白說與華陽何處居

暮春書懷寄翁十

帝里逢春雨不乾纔晴數日又春還桐花半落官河水
榆葉全遮客舍山未悔闊疎令事去最憐之絕礙身閒

菖蒲九節今堪采思爾逍遙澗谷間

移居謝友人見過

賃得民居亦自清病身於此寄飄零
笋從壞砌磚中出山在鄰家樹上青
有井極甘便試茗無花可插任空瓶
巷南巷北相知少感爾詩人遠扣扃

多景樓晚望

落日闌干與鴈平往來疑有舊英靈
潮生海口微茫白麥秀淮南迤邐青
遠賈泊舟趨地利老僧指甕說州形

殘陽忽送吹營角聲引邊愁不可聽

會宿再送子野

又承出郭到貧家一度分攜髣髴華
自說印書春可寄獨慚缺酒夜難賒
眠遲古鼎銷殘火吟苦寒釭落細花
羸病不能親送別夢魂先立渡頭沙

過弋陽

三月三番過弋陽吾生辛苦莫思量
磨圓灘石幾年浪丹盡江楓昨夜霜
已算中途當度牒更憐抵舍未為鄉

高眠舊有山中約只欠青驪道士方

翁卷

鮑使君閒居

吟樓影在湖波上吟景長從望處生
疊石擬成幽嶂色種松移得遠灘聲
多諳藥品曾因病却著荷衣欲避名
聞說近來心更靜案頭惟有一琴橫

山中

山中凡事幸相宜第一紅塵免上衣
尋藥每同丹客去

拾薪多趁牧兒歸，鳴泉漱石寒蒲潔。
宿霧蒸泥早蕨肥，不奈鄰峰學禪伴。
時時來此叩巖扉。

次韻葛天民

接得詩來勝接書，感君情思豁然舒。
却看城裏誰家竹，又鎖湖邊舊住廬。
曾有退之憐賈島，豈無得意薦相如。
欲知別後予蹤跡，只向此間閒釣魚。

贈陳管轄

一拂清風一袖雲，紫陽容貌鶴精神。
詩因道進言辭別。

丹得師傳火候真。廬岳峰前吟瀑布。渾儀圖上禮星辰。
我來暫作閒人歇。多謝仙翁相訪頻。

宿南昌僧舍

突兀禪宮何代餘。閒同衲客聽鐘魚。身如野鶴棲無定。
愁似頑藤挽不除。舊隱定多新長竹。遠交全乏近來書。
爐香碗茗晴窗下。數軸楞伽屢展舒。

留別南昌諸友

衰顏怕被青銅見。病骨堪同瘦鶴羣。出久併荒幽徑菊。

未歸長憶滿山雲
春風豈識吟人恨
夜雨頻於客舍聞
萬柳百花好時節
別君愁緒亂紛紛

徐照

題永州唐德明竹園

渭川千畝空聞說
得似君家亦是難
畦僕不知生鳳實
野翁祇欲乞漁竿
忽驚殘粉飄蒼雪
最喜幽聲勝遠灘
六月火雲飛不盡
誰知此處獨清寒

同劉孝若野步

杖履相從步野田坐臨堦庀和詩篇要看隔水人家菊
試借繫門漁父船且緩歸舟知有月不生酒興為無錢
寒來莫問家中事纔得身閒即是仙

會飲鮑使君池亭

案上一琴書數卷不須此處有笙歌厭居城市觀天小
喜到君家見月多葉滿地飛隨步履鶴於人熟聽吟哦
明朝也向山中去手把松枝養太和

徐璣

淶波亭寄泊晨起有感

塵埃幾泯寸心清
晨起孤吟在水亭
晴景淡紅煙景白
近山濃綠遠山青
初因薄宦成羈旅
忽伴輕鷗落渚汀
安得數年居此地
待湏長日補騷經

壬戌二月

山城二月景如何
行處時時聽踏歌
淡色似黃楊葉小
濃香如蜜菜花多
春容每到晴時改
天氣偏從雨後和
好向溪頭尋釣侶
小溪連夕漲清波

題東山道院

古院嵌嵌石作層綠苔芳草近郊垞溪流偶到門前合
山色偏來竹裏青靜與黃蜂通戶牖閒將白鳥共沙汀
道人亦有能琴者一曲清徽最可聽

六月歸途

星明殘照數峰晴夜靜惟聞水有聲六月行人須早起
一天涼露溼衣輕宦情每向途中薄詩句多於馬上成
故里諸公應念我稻花香裏計歸程

中秋集鮑樓作

秋在湖樓正可過扁舟窈窕逐菱歌
淡雲遮月連天白
遠水生涼入夜多已是高人難會聚
矧逢佳節共吟哦
明朝此集喧城市應說風流似永和

登滕王閣

重重樓閣倚江干岸草汀煙遠近間
春水生時都是水
西山青外別無山雲歸長若真人在
風過猶疑帝子還
自古舟船城下泊幾人來此望鄉關

泊馬公嶺

維舟拂曉步平沙晚泊雲根第一家
新取菜蔬沾野露旋編籬落帶山花
門前相對青峰小屋後流來白水斜
可愛山翁無一事藤牆西畔看蜂衙

薛師石

和葛天民

賈島文章懷素書得來讀罷卷還舒
西湖柳下為君宅東海雲邊是我廬
千里江山長若此一生心抱欲何如

相思惟有加餐飯不暇逢人寄鯉魚

送翁靈舒閒遊

袖有新詩如美玉知君去意十分濃
山行見草認靈藥
午歇就陰依古松
兩髯已添蓬
藁色三年判作飄零蹤
羈情夜後更愁絕
深澗斷猿溪寺鐘

潘耒

題釣臺

蟬冠未必似羊裘
出處當時已熟籌
但得諸公依日月

不妨老子卧林丘英雄陳跡千年在香火空山萬木秋
自笑黃塵吹髣髴客愛來祠下繫孤舟

趙蕃

頃與公擇讀東坡雪後北堂詩嘗約追和去冬

適無雪正月二十日大雪因用前韻呈公擇

錄一

首

雪埋老屋無薪賣晨起謀炊自毀車覓飽預期千頃麥
破慳先試一春花便營野屐尋茶戶更約綈袍當酒家

處士只今疑姓賈
壁間但沒掛錢義

韓琥

中秋呈潘德父

一年明月在中秋
幾日陰雲不奈愁
忽喜新晴轉書室
極知清夜照歌樓
醉當弄影如坡老
詩就撞鐘憶貫休
千里故人應若此
吾生常好更何求

寒食

曉色猶籠淡淡煙
花間行過小溪邊
人家寒食當晴日

野老春遊近午天
吹盡海棠無步障
開成山柳有堆綿
呼兒覓友從鄰伴
閒看邨農又下田

高翥

曉出黃山寺

曉上籃輿出寶坊
野塘山路盡春光
試穿松影登平陸
已覺鐘聲在上方
草色溪流高下碧
菜花楊柳淺深黃
杖藜切莫匆匆去
有伴行春不要忙

春日湖上

清波門外放船時
盡日輕寒戀客衣
花下笑聲人共語
柳邊牆影燕初飛
晚風不定棠梨瘦
夜雨相連薺麥肥
最憶故山春更好
宵來先遣夢魂歸

靜對

靜對爐煙一縷霞
謝天成就淡生涯
安排瓦硯臨章草
收拾瓷瓶插鄭花
莫問家儲無擔石
休嫌人事似團沙
三杯竟醉醒時晚
卧看春雲送日斜

山行即事

籃輿破曉入山家，獨木橋低小徑斜。
屋角盡懸牛蒡菜，籬根多發馬蘭花。
主人一笑先呼酒，勸客三杯便當茶。
我已經年無此樂，為憐身久在京華。

周文璞

小寒食

從來寒食多風雨，不料窮鄉亦管絃。
壯歲心情悲昨夢，異鄉時序感流年。
偶隨遊子來溪上，因與棠梨立路邊。
從此堪悲轉憔悴，隨羣同上釣魚船。

葛天民

西湖泛舟入靈隱山

晴嵐漠漠水溶溶
落葉遮船翠蓋重
秋色盡為漁者占
山光多向道人濃
雪連合抱前邨樹
磴繞飛來小朶峰
送罷夕陽迎素月
樓臺高下自鳴鐘

孤山後舟中寫望

水接遙空分外寬
孤山月出靜中看
疑從弱水移圓嶠
似共姮娥住廣寒
秋雨秋風初過後
荷花荷葉半凋殘

西邨數點歸鴉溼老子新題墨未乾

酬畫上人石湖春望

蕩蕩春風草木香
茫茫澤國水雲長
鶯來占柳為歌院
蜨去尋花作醉鄉
閒與物情聊品第
老於文字嬾巡行
望中別有闌情處
幾度朝陽又夕陽

平居遣興

隔籬人語自喧嘲
緊閉苔扉不許敲
談麈帶塵懸屋角
牽牛承露上林梢
投閒得計心常足
擬古成編手自鈔

風雨欲來偏感處
蟻先移穴鵲移巢

葉紹翁

題孫端甫別墅

幽居地僻少人知
野水春風枳樹籬
檢歷預尋移竹日
題牆閒記種花時
堪嗤狡兔須三窟
只學鷓鴣占一枝
淨埽綠苔斟濁酒
鄰家吹過野棠梨

張弋

舒州歲暮

窮冬日日愛天晴古寺門開絕送迎
野鶴忽來橋上立山僧獨向水邊行
過寒梅樹白全少入臘草芽青漸生
又是舒州一年了怕看新歷動鄉情

趙汝鎡

早征

店雞一唱接疎鐘起整行裝尚夢中
沙路踏殘征馬月柳隄啼斷曉鶯風
水肥渡險添舟子岸沒途窮問牧童
千里鄉人逢陌上片時握手各西東

縱步

久雨厭人妨野步幾時便得此番晴到橋喚僕來相助
過寺逢僧約共行籬落一團飛蛺蝶汀州數點立鷓鴣
農家竹裏深深住風度茅簷紡織聲

題合江亭

石鼓山頭一小亭乾坤萬里眼雙明雖因刺史能尋勝
不遇昌黎豈得名衡嶽雲開天洗碧蒸江湘合水爭清
書巖莫辨當時事空積塵泥野草生

昌黎有題合江亭
寄刺史鄒君詩末

有願書巖上石勿
使塵泥浣之句

崇真觀東軒

東軒面水枕山阿左右雲煙溼翠蘿
風度鶴聲聞遠壑日移松影轉前坡
愁來獨靠清尊遣老去休憎白髮多
道士罷琴揮醉筆詩成自喚小童哦

黃幹見約小飲就宿

病後何人慰寂寥長鬚持簡忽相招
溪山見說為樓爽杖屨寧辭去郭遙
柳絮一天晴舞雪松聲十里夜聞潮

談詩直到疎鐘動酒困頻將茗椀澆

懷亨父

兩年隻影瀟湘去料想塵埃白髮侵久雨千山秋得意
西風一鴈客關心或於夢裏陪談笑每向人前問信音
憶昔賡詩巖桂下花開今日歎孤斟

題會稽用林帥侍韻

東越乾坤到眼邊亂雲連壑草迷川五更城落千巖月
萬頃湖開一鏡天鼓角聲殘秦望曉樓臺影溼卧龍煙

舊時太史登臨處每想風流為慨然

徐似道

白龍洞

靈仙窟宅不多見車馬往來成再遊後洞白雲前洞出
上池紅葉下池流水花照眼明金鯽石髮藏春護玉虬
邂逅尚青遊子眼栖遲應白老僧頭

劉學箕

曉起

雙箸不皺樂平生一斗時能對客傾
曉枕却醒紅日上
篆爐未歇紫煙明
畫橋貼水輕飛燕
綠牖依山靜轉鶯
隨雨隨晴看天氣
緩扶筇杖繞園行

葉茵

偶成

把筇為屋竹為城
柏子香銷道氣生
九十春光花一片
萬千心事雨三更
連邨鼉鼓相高下
斷浦漁燈半滅明
閉戶和衣尋小榻
夢回猶聽讀書聲

僧房夜坐

四十二間廊底客不知春向柳邊深三旬禁足持僧戒
終日看書養道心露草帶雲眠野鹿風枝搖月啖幽禽
一塵不到爐煙靜自向空寮續近吟

舫齋

居家巧作浮家樣此即人生不繫舟政恐風波起平地
直教砥柱屹中流浪花影動重簾月潮汛聲喧萬葉秋
夢裏不知容膝計翻身栩栩逐輕鷗

劉子澄

洞庭湖

天孫歲晚會湘靈
倒瀉銀河合洞庭
上下天光惟一白
中間山色不多青
荆潭萬里收塵滓
宇宙連宵失晦明
莫道人間少仙境
詩思酒魄一時醒

真德秀

使都梁次韻

第一山前路半蕪
憑闌小立撚吟鬚
雲橫紫塞無來鴈

冰斷黃流不渡狐
此日都梁聊共醉
向來夷甫可長吁
淮山那管人間事
依舊青青出畫圖

杜範

已巳登玉峰亭

與君攜手上鑾坡
多少塵襟盡刮磨
一鳥橫邊秋靄淡
片雲歸處夕陽多
潮來萬里翻明練
山簇千峰列翠螺
此地不堪歸去早
佇看明月漲金波

洪咨夔

寶福寺山房

門巷蕭然雀可羅
藏書萬卷自研磨
嬾尋玉女登西嶽
甘伴金仙坐補陀
書帶草長塵慮少
鉢曇花放道緣多
攜觴問字如相過
引導松間不用呵

吳淵

遊青山

謝朓宅
在焉

碧嶂千層鎮一州
十年前記作斯遊
因看紅杏行停轡
為濯清泉坐解裘
怪石巉巖蹲虎豹
老松偃蹇卧龍虬

轉高轉有無窮景杖履何妨絕頂頭

橫碧堂

每來登眺便看伸高處蒼穹儼若臨投老光陰隨日晚
思歸情緒與秋深鷺飛沙際明人目鴈滿江頭動客心
北望淮肥何處是晚來煙霧正沈沈

揮麈堂

老守重來何所為築成臺榭鑿成池綠深夜雨龜魚遠
紅壓春風鶯燕遲民樂軒墀偏少訟官閒園圃自多詩

鳳團啜罷投衾枕夢覺花間日影移

沈說

暮春

燕翼初乾綠滿池
桑陰收盡麥黃時
一年春事又成夢
幾日愁懷欲廢詩
料理病身嘗藥徧
揩摩睡眼看書遲
脩然獨倚闌干立
花下狸奴卧弄兒

煙浦

煙浦殘鴉舞夕陽
風枝病葉似初霜
眼中秋色十分淨

沙外寒流一綫長
溪女得魚烹碎白
田家收穀晒新黃
偏尋野趣歸來晚
草際螢飛點點光

戴復古

江濱曉步

津頭曉步落潮痕
行盡蒲根到柳根
鴈影參差半江月
雞聲呶喔數家邨
求魚看下連筒釣
乞火聽敲鄰舍門
料得錦城無此景
欲將圖畫寄王孫

鄂渚煙波亭

倚徧南樓更鶴樓小亭瀟洒最宜秋接天煙浪來三峽
隔岸樓臺又一州豪傑不生機事息古今無盡大江流
憑闌日暮懷鄉國崔顥詩中舊日愁

春日二首呈黃子邁大卿

野人何得以詩鳴落魄騎驢走帝京白髮半頭驚歲月
虛名一日動公卿頗思湖上春風約不奈樓頭夜雨聲
柳外斷雲篩日影試聽幽鳥話新晴

帝里風光二月新西湖幾隊踏青人杏花時節偏饒雨

楊柳門牆易得春或是或非塵裏事無窮無達醉中身
五陵年少誇豪舉寂寞詩家戴叔倫

梅

孤標粲粲壓羣葩獨占春風管歲華幾樹參差江上路
數枝裝點野人家冰池照影何須月雪岸聞香不見花
絕似林間隱君子自從幽處作生涯

李季允侍郎舟中

憶昨楓橋旣語離何期千里又相隨太湖不見鷗夷子

秋浦同尋杜牧之燈火船窗深夜語江山客路早冬詩
人間草木空無數除却梅花莫我知

廬山十首

錄三首

山靈未許到天池又作西林一宿期寺是晉時陶侃宅
記傳隋代率更碑山椒雲氣易為雨客子情懷多費詩
暫借蒲團學禪寂茶煙飛繞髻邊絲

道人問我看廬山上爭如閣上看呈露千峰秋落木
雕鏤萬象客憑闌靜中見得天機妙閒裏回觀世路難

管領風光有微憾桂花香裏酒餅乾

擁鼻行吟上下廊今宵又宿贊公房松搖半夜風聲壯
桂染中秋月色香白石清泉聞笑語名山大澤出文章
老夫甘作無名者不逐紛紛舉子忙

送滕審言歸長沙別無聊

折柳亭前送故人平沙留得馬蹄痕雲生渡北迷行路
煙起江南認別邨恨不與君同上道歸來無伴自開樽
西樓獨倚黃昏月欲倩飛鴻寄斷魂

題何季湧江亭

勝槩何妨近市塵紅塵踈處著三椽
數重千嶂橫天末一道澄江在眼前
海浪浴紅朝出日樹林堆碧晚生煙
請君分付堤邊石莫使漁翁來繫船

余惠叔訪舊

扁舟訪舊入橫塘新柳今如舊
柳長室邇人遙春寂寂風流雲散事
茫茫縱題紅葉隨流水誰弄青梅出
短牆故是沈郎愁絕處杜鵑不斷叫
斜陽

滕審言相遇話舊

憶昨同君訪月林幾年相別到於今江山花草生詩夢
風雨憂愁長道心久矣無波觀古井悠然得趣聽鳴琴
一生奔走成何事塵滿征衫雪滿簪

陳孟參陳明子同遊麻姑山

麻姑壇上共登臨野客悠然起道心丹井汲泉深百尺
星杉聳壑到千尋青蓮花白仙蹤遠烏柏葉紅秋意深
何用金盤擘麟脯山肴濁酒可同斟

田園吟

俗諺桐樹發花茶戶大
家又云樹無梅手無杯

自古田園活計長醉敲牛角取宮商催耕啼後新秧綠
鍛磨鳴時大麥黃桐樹著花茶戶富梅林無實秫田荒
狂夫本是農家子拋却一犁遊四方

竹洲諸姪孫小集永嘉蔣子高有詩次其原韻

一首

美景能兼樂事難愁來惟仗酒遮欄昂藏病骨兼詩瘦
料峭春風帶臘寒喬木尚疑前輩在好花應笑老人看

忍拋明月先歸去
輸與諸郎徹夜歡

題王制機新樓

綠雲圖上新輪奐
彈壓江山氣勢豪
手拍危欄看星斗
目窮滄海見波濤
人間何處望不到
天下有樓無此高
俯視河陽桃李巷
清風吹斷市塵囂

夜宿田家

簷笠相隨走路岐
一春不換舊征衣
雨行山崦黃泥坂
夜叩田間白板扉
身在亂蛙聲裏睡
心從化蝶夢中歸

鄉書十寄九不達天北天南鴈自飛

戴曷

次君玉弟聞新鴈

霜風颯颯花洲避北趨南巧自謀
倦翮飛殘千里月
寒風催老一天秋
乍教騷客驚詩夢
莫為征夫寄別愁
汝渡塞垣應未久
新來煙燧已沉不

四月即景

茶歌纔了又田歌
節物真成一鳥過
蒼竹颭風涼意足

碧梧留雨夜聲多
瓜緣茅屋抽長蔓
藕過蔬畦出矮荷
最喜白鷗相狎久
對人自在浴清波

幽棲

幽棲頗喜隔囂喧
無客柴門盡日關
汲水灌花私雨露
臨池疊石幻溪山
四時有景常能好
一世無人放得閒
清坐小亭觀衆妙
數聲黃鳥綠陰間

閒居幽事

閒居幽事屬田園
何必山林始避喧
足水早禾分母子

多年脩竹見翁孫欣然勝敗無心奕兀爾醉醒隨意尊
昨夜一番雷雨過綠波微漲曲池痕

幽興

不賦千鍾賦一簞天公有意養癡頑書猶能看未為老
詩亦莫吟方是閒寬著庭除貪貯月少栽竹樹要觀山
空階兩日無行跡又上苔花幾點斑

嚴羽

紫霞樓夜飲

西樓孤絕倚天青
我愛銀河對戶橫
露滿碧梧風屢起
煙消綠嶠月初生
仙人共酌丹霞酒
逸侶同吹白玉笙
不向此時窮笑傲
更從何處豁高情

臨川送鄭遐之雲夢

天涯十載無窮恨
老淚燈前語罷垂
明發又為千里別
相思應盡一生期
洞庭波浪帆開晚
雲夢蒹葭鳥去遲
世亂音書到何日
關河一望不勝悲

將至潯陽途中寄諸昆弟

渺渺孤帆去幾程悠悠天際望湓城一身避亂辭鄉國
千里相思隔弟兄猿叫匡廬寒暮色鴈過彭蠡帶秋聲
江湖北去多飄泊腸斷風塵遠別情

李昂英

峽山全清閣

無塵明鏡太玲瓏匣向周遭紫翠中地有仙家雲母石
天然上界水晶宮通宵如畫溪頭月盛夏回秋竹罽風
萬斛客愁都盪盡一杯聖酒畫欄東

送恩平潛使君還里

風流太守作春遊到處恩波浩蕩流
懷舊故鄉需上日移舟別浦趁中秋
聲歌洋溢行人口書翰縱橫健筆頭
識面雖新心頗熟殷勤話別送歸舟

送荃翁張端義之惠陽

吹面東風豎綠蓑詩翁七十醉婆娑
放懷自號天墮子知我無如春夢婆
吟有小奚磨破硯卧看赤脚踏行窩
太湖爭似黃灣闊高浪黏天獨笑過

四月十五遊僧寺

今日快逢僧結夏不妨乘興扣禪扉
山垂遠瀑溪聲急風捲癡雲雨脚稀
囊錦詩成僧借看紋楸碁落鳥驚飛
比來莫訝凭欄久傑閣新成拂翠微

徐經孫

福州即事

一別居諸歲月增遙聞此景畫難能
潮田種稻重收穀道路逢人半是僧
城裏三山千簇寺夜間雙塔百枝燈

常年六月東崖下地湧寒泉漱齒冰

姚鏞

自青原回訪敏叔幾不相遇

曉汲三泉洗硯回要看奇石立蒼苔騎驢應為尋詩出
放鶴還知有客來一井清寒宜茗飲千林黃落獨梅開
他時老圃如能學只乞山中橘本栽

寄趙東野時以帥檄撫定贛叛

清晨閒上鬱孤臺鼓咽譙樓角更哀病葉滿山難獨埽

狂花一樹為誰開
泉枯石井獅空吼
雨暗荒池鳳不來
欲向江東問仙老
海風吹浪駕舟回

出山

雲陰漠漠雨蕭蕭
坐兀歸輿野興遙
石澗水流苔路滑
竹籬秋去菊花焦
誰將束縵求山火
自立寒谿問板橋
官事奔奔何日了
倚松臨水羨漁樵

方岳

次韻田園居

帶郭林塘儘可居
秫田雖少不如歸
荒煙五畝竹中半
明月一間山四圍
草卧夕陽牛犢健
菊留秋色蟹螯肥
園翁溪友過從慣
怕有人來莫掩扉

感懷十首

錄一首

挂上風煙更一層
瘦藤對倚玉陵嶒
左花右竹自昭穆
春鶴秋猿相友朋
五畝園為終老計
半間雲住在家僧
蹲鴟生乳菰如臂
莫道山翁百不能

採蕨

野燒初肥紫玉圓枯松瀑布煮春煙偃徐妙處元無骨
鈎弋生來已作拳蚤韭不甘同臭味秋萼雖滑帶腥涎
食經豈為兒曹設弱脚寒中愁未然

十二月十日

酒醒開門雪滿山徑穿疎竹上危欄溪山與我俱成畫
草樹惟梅大耐寒留伴夜深銀鑿落莫緣春近玉闌珊
老枝擎重供詩嚼一洗相如渴肺肝

次韻徐宰集珠溪

僧不須敲飯後鐘自攜茶去借松風斬新山色佛頭綠
依舊桃花人面紅春甕貯冰搖玉螳夜堂供蠟綴釵蟲
山靈共欲留人住弦月隔溪煙霧濛

過北固山下舊居

池塘燕子舊人家楊柳春寒一徑斜夜讀自生書帶草
朝饑曾對米囊花侯誰在矣山如昨今我來思髮已華
舍館不知何日定竹輿鳴雨又呶啞

有感

桃花紅雨柳花綿風物愁予重惘然滿目江山分楚越
舊遊池館鎖塵煙朝雲漠漠今安在夜月荒荒空自圓
只有雪衣孤鶴在竹間曾共聳吟肩

約君用

十日春寒挾雨俱新晴物色總歡娛花曾識面若含笑
鳥不知名時自呼流水短橋宜畫取暖風遲日有詩無
儻來須蠟登山屐邨北邨南路欲蕪

春日雜興

高下雲藏野老家縱橫水漱竹籬斜
勒將春去許多雨流出山來都是花
白首風煙三徑草清時鼓吹一池蛙
身閒不耐閒雙手洗甌炊香夜作茶

南岡北嶺對窗扉看盡朝嵐與夕霏
社後未曾聞燕語雨中誰不惜花飛
山醅約莫幾時熟沙笋輪囷一尺圍
莫怨風光損桃李茶蘼芍藥又芳菲

綠陰芳樹鳥啼春與客相攜發興新
半落杏花初過雨微酸梅子已生仁
每尋詩去必遷坐穩跨牛歸不問津

筋力尚堪蓑笠在莫欺老子髮如銀

寄至能

江上歸來即定巢牆陰野竹破新梢有人問字時相過
無事觀書手自抄世態十年多客夢月明千里少朋交
茅齋亦有秋崖藁留與青山作解嘲

山行

歲晚誰同澗谷槃一牛喚犢野煙寒邨如有雪蕎花白
山未著霜桐葉丹是處豐登茅店酒老夫閒散竹皮冠

醉歸更草郊居賦傳與詩人作畫看

利登

晚步

住在山塘深更深門前落葉與堦平
高人聽鶴來相過野老因樵熟識名
一水欲流山影去斷雲時伴燒痕生
脩然獨步蓮峰夕十里松風秋月明

仙塘

一椽自著此山幽蘆葦蕭蕭繞屋頭
野老屢來詢姓氏

社人相約賽春秋寒山此去無飛燕白水初傳有遠鷗
病起偶然成獨往斜煙冷照使人愁

張道治

梅花

纔有梅花便自奇清香分付入新詩閒持杯酒臨風處
獨倚闌干待月時試向園林千萬樹何如籬落兩三枝
霜天角裏空哀怨丘壑風流總不知

鄭震

卜居

久欲謀歸力不任
浮雲蹤跡謾巢林
功名未入屠龍手
貧賤常懷買鶴心
月下開門微雨過
樓頭聞笛二更深
世間萬事俱陳迹
空倚西風閱古今

林希逸

郊行即事

老樹菌生鋪兔目
斷溪泥溼印牛蹄
山僧渡水雙攜履
野客歸邨獨杖藜
羣鳥爭枝聲上下
孤松夾澗影東西

行吟注意搜詩料欲近前溪路忽迷

周弼

庾樓

欲望江山夜轉真胡床曾此對嘉賓
傷心皓月長流水回首清風不見人
花落雉樓橫角暮草生鷗渚破船春
歸程豈暇頻登覽分付羈愁與白蘋

南樓懷古

茫茫迂曲度平川何處孤邨近水邊
煙護劉琮殘壁壘

雨沈黃祖舊樓船
寒沙細擁菰蘆地
破隴斜耕苜蓿田
見說去年秋潦後
更無茅屋起炊煙

浣紗秋日

衣裳單薄髣蕭騷
獨凭危欄首屢搔
出壁亂雲分片段
隔江飛雨見絲毫
庭前斷續蛩爭響
簷外輕便蜨鬪高
多少好山俱在眼
媿無短屐共遊遨

清溪樓閣暮沉沉
不覺登臨夜欲深
幾處捲簾催酒笛
誰家閉戶搗衣砧
一朝野霧三朝溼
十日江天九日陰

暗喜礙人公事少
自來收拾送秋吟

錢時

頰口橋觀月用東坡韻

青山面面若相招
一路涼風萬木搖
白雪如輪飛繭緒
綠雲隨手散秧苗
今宵擬客喉頭店
好月留人頰口橋
雪浪氷輪兩豪傑
男兒空飽十圍腰

錢端琮

暮春

園林深處綠成堆更著松陰一徑苔
煙欲過牆風約轉水將爭港石衝回
斷雲收雨鳩呼婦嫩麥盈堤雉應媒
獨有殘紅春不管等閒飛入酒卮來

許棐

鄭介道見訪

步頭楊柳種多年今日方維勝客船埽石共看山色坐
枕書同聽雨聲眠溪羹旋煮蓴絲滑野飯新炊芡玉圓
不管歸心忙似箭強留吟過菊花天

施樞

用雪坡春色韻

纔出城門興便濃
晴光野色兩俱融
柳方染得三分綠
桃已薰成一半紅
山湧林巒荒寺隱
湖分港汊小舟通
相攜各自論年事
幾度春風上髩蓬

滄浪亭

長史遺蹤二百年
直教名字到今傳
渚香細浥蓮鬚雨
野色輕團竹尾煙
但得幽情闕水石
何須隱迹痾林泉

客中正有塵纓在來此清遊亦是緣

三過垂虹

秋來三度過垂虹
灝氣橫江水接空
帆影輕浮千幅月
漁竿冷浸一絲風
楓初落葉前邨近
荷有餘香別浦通
笑拍闌干天地闊
鱸尊酒許誰同

御選宋詩卷五十四